

# Parçên payîzeka dereng



Bilind Mihemed

Singê te payîzeka derenge û  
Tiblên min yên westiyayî  
Bo lêvên qeşav girtî û  
Maç kirina te dewraneka!  
Heku şevê dadda!, çavên min  
diçûne paxlên te û  
Bêhna mêyatiyê zeviya singê te  
bi kola radiêxist  
Min diviya pitir nêzîk te bibim  
Tu dibûye leylan.  
Li pişt rojê...  
Textê min û te dihat danan  
Tiblên min mêrga leşê te  
diçerand,  
Ji nişkave  
Şaşkeka  
Simbêl şor  
Di xeweka kûr day û  
Ez yê li dûv leylana te dibezim!  
Bêhnê  
Aramiya te têk dida  
Bi rex cihê min ve rûbareke  
Weku şehmaran min digevêzit  
Min ser av dike,  
Bin av dike  
Têrbûn ji lêvên te tineya  
Di benda stiraneka aviz da  
Me di stirand...  
Tu hemî tiştî û  
Û hemî tişt ji teye,

Parçên leşê min samba dikirin,  
Giropên xwînê ji navêk  
vediqetiyan!

Singê te payîzeka derenge û  
Tiblên min xewna pêve dibînin!  
Rewîna ((sa)) gûleyeka bi tirse  
Min ji hembêza te direvînit  
Kê tu birî?!  
Kê ez ji karwanê eşqa te  
veqetandim?!

Singê te payîzeka derenge û  
Di bin tizbyên sofiyan ve xwîna  
dibarit!  
Balinde yên daddin  
Balinde yên radibin,  
Di nav payîza singê te da  
Payîzeka xewna mina yekaneyê  
Çiblaq dihête zincîrkirin!

